

Uunga siunnersuut: Folketingip Ombudsmandia pillugu inatsisip allanngortinneqarnissaa pillugu inatsisit assigiinngitsut Kalaallit Nunaannut atuutilersinneqarnissaannut peqqussut pillugu Inatsisartut aalajangiiffigisassaattut siunnersuut.

(Naalakkersuisut Siulittaasuut)

Saqqummiussissut

(Naalakkersuisut Siulittaasuut)

Siullermeerneqarnera

Matumuuna Folketingip Ombudsmandia pillugu inatsisip allanngortinneqarnissaa pillugu inatsisit assigiinngitsut Kalaallit Nunaannut atuutilersinneqarnissaannut peqqussut pillugu Inatsisartut aalajangiiffigisassaattut siunnersuut Naalakkersuisut saqqummiuppaat.

Folketingip Ombudsmandia pillugu inatsit, kiisalu tamassuma allannguutaa 1. januar 1997-mi aamma 1. januar 2007-mi atuutilernermi Kalaallit Nunaanni atuutsinneqarsimapput. Ombudsmandi pillugu inatsit kingorna marloriarluni allanngortinneqarsimavoq. Allannguutit taakkua marluk sulit Kalaallit Nunaanni atuutsinneqalersimangillat.

Folketingip Ombudsmandiata Kalaallit Nunaanni ombudsmandi pillugu inatsit nutarterneqaqqullugu Justitsministeria qinnuigisimavaa. Naalakkersuisut Kalaallit Nunaanni ombudsmandi pillugu inatsisip nutarterneqartariaqarneranut isumaqataapput, taamaasillutillu siunnersuutit Inatsisartuni suliarineqarnissaanik akuersissutigineqarnissaanillu kissaateqarlutik.

Malittarisassat maannakkorpiat Kalaallit Nunaannut atuuttut eqqarsaatigalugit inatsimmi marloriartumik allannguisoqarsimavoq.

Siulleq FN-ip konventioniani naalliutitsinermut allatigulluunniit peqqarniitsumik, atussaangitsumik nikassaasumilluunniit pineqarnissamut imaluunniit pillarneqarnissamut protokoli malinneqarsinnaasoq naapertorlugi taamatut pisoqannginnissaanut nunami pinaveersaartitsinissaq siunertaralugu Folketingip Ombudsmandianik 2007-mi toqqaanerup kinguneranik arlalitsigut allannguineruvoq.

Aappaa ombudsmandip Meeqqanut Allaffiata pilersinneqarneranut kiisalu Folketingip Ombudsmandiata ukiuni qulini atuussinnaatitaaneranut aalajangiinermut tunngassuteqarpoq.

Inatsimmut allannguutinullu atuuttunut tunngatillugu peqqussut ima iluarsineqarpoq, taamaallaat inatsisini attuumassuteqartuni ombudsmandip sulinerani Kalaallit Nunaanni pisortatigut aqutsinermi naalagaaffeqatigiinnermit isumagineqartortai iluarsivigineqarlutik.

Taamatut oqaaseqarluta Inatsisartut suliarinnilluarnissaannut siunnersuut ingerlatipparput.